

## **GREDISCJIE**

- Palaç Venier (n°4)
- Glesie e cjampanili (n°55 e n°26)
- Vie Crucis (n°56)
- Glesie di Sant Zorç (n°3)
- Pituris (n°22 e n°37)
- Rogazions (n°39)

### **PALAÇ VENIER**

Cheste costruzion e je dal secul XVII; prin e jere une cjase di grancj comerciants là che al jere un albiere.

Po le àn mudade intun palaç cun sore un grant salon. Cu la invasion de prime vuere mondiâl i todescs a àn puartât vie dut.

Il steme de famee al è fat di une comete blancje in cressi cul fondâl turchin sore dai cuei ros.

### **GLESIE E CJAMPANILI**

La glesie e je dal XV secul; e veve il cjampanili a spice cun dôs cjampanis, tacât de façade, colade par vie di un folc.

Par chest, tal 1696 a àn fat sù un cjampanili gnûf.

La glesie le àn slargjate un pôc a la volte fintremai al 1850 cirche, cuant che e cjapà l'implant che e à cumò.

E je intitulade a sant Stiefin Protomartar. Famôs a son i sîs grancj frescs des parêts, piturâts di Aurelio Mariani di Velletri dal 1908 al 1910.

Impuartantis lis pituris dal coro che a mostrin i cuatri evangjeliscj, fats simpri di Mariani, ma colâts par vie dal fûc che al cjapà la glesie dal 1971. La statue de Madone "Marie mari di Diu", di buine fatece, e je dal 1900; le fasè "Besarel", impuartant scultôr venezian. Il portâl de glesie dal 1515, al è dal scultôr Pilacorte.

## **VIE CRUCIS**

La Vie Crucis si le fâs di Vinars Sant, cul plevan. I fantacins a disin une preiere a ogni stazion.

Al è un fat che al lasse a bocje vierte, parcè che lis stazions a son fûr, tor ator de glesie e a son 15 anconis pituradis.

E fo fate dal 1748 daûr di une che e veve il stes implant e che e jere tal Colosseu di Rome.

I vieris frescs si son smavîts par vie dal timp e tal 1952 a son stâts restaurâts dal pitôr Aurelio Mariani.

## **GLESIE DI SANT ZORÇ**

E je dal 1400 e e fo fate de int dal paîs; e conserve oparis impuartantis tant che la balaustre, la pidele de aghe sante dal Pilacorte e la tele di sant Zorç martar dal Begni, dal 1737.

Difûr e je une grande piture di sant Cristoful; dentri a son i frescs di sant Zorç martar, sant Stiefin, sant Laurinç e sant Zuan fats di plui artiscj che no si sa ce che a vevin non.

## **FRESCS**

Dilunc vie Massimo d'Azeglio si puedin viodi sui mûrs des cjasis plui pituris. A presentin:

- La Madone cul frut e sants dal 1761. Al è di pôc che le àn restaurade.
- Fuide in Egjit cu la Madone, il frut, il mus e sant Josef; dal 1770. Al è il plui biel dal paîs e nol è ruvinât.
- Sant Pieri cu la clâf in man. Restaurât di pôc.
- Un tritic e tal mieç la Madone di Lorêt protetore dai aviatôrs; a diestre sant Michêl arcagnul e a çampe une Sante Martare.

## **ROGAZIONS**

Ai 25 di Avrîl si fâs une procession pai trois di campagne. A ogni crosere si lei un toc di Vanzeli e il plevan al benedis i cjamps.

Si rive fin a Casali di Loreto (Pannellia), là che si cjatinsi tun grant curfîl e si pree.

Li ogni famee e puarte alc di mangjâ o di bevi; ae fin de procession (se al è biel timp) si fâs un biel picnic ducj insieme.